

30 MAY 1998

MCA-Industri

MCA TUBUH MAJLIS PERUNDINGAN INDUSTRI KECIL DAN SEDERHANA

KUALA LUMPUR, 30 Mei (Bernama) -- MCA akan menubuhkan majlis perundingan peringkat negeri bagi industri kecil dan sederhana (IKS) dalam usaha mengerah segala sumber yang ada untuk membantu kerajaan menangani masalah ekonomi.

Presiden MCA Datuk Seri Dr Ling Liong Sik berkata matlamat utama majlis itu bagi menjaga kepentingan industri kecil dan sederhana yang kini merangkumi 75 peratus daripada sektor pembuatan negara.

Sebagai langkah susulan, pusat perundingan IKS peringkat kebangsaan akan dibentuk kemudian.

"MCA sedar betapa penting sumbangan industri kecil dan sederhana dalam pertumbuhan ekonomi negara. Ia satu aktiviti ekonomi yang dianggap boleh memainkan peranan penting dalam membantu usaha memulih ekonomi negara," katanya ketika berucap pada perhimpunan agung ke-45 MCA di Wisma MCA di sini.

Lebih 2,000 perwakilan dari seluruh negara menghadiri perhimpunan sehari itu yang dirasmikan Perdana Menteri Datuk Seri Dr Mahathir Mohamad.

Dr Ling yang juga Menteri Pengangkutan berkata pembentukan majlis itu dapat memastikan segala isu dan masalah berkaitan IKS diketengahkan serta ditangani dengan cepat dan berkesan.

Selain MCA, majlis perundingan itu akan diwakili Persatuan Perniagaan Cina, Gabungan Persatuan Cina Malaysia serta wakil IKS.

Beliau juga berkata MCA sedang merangka satu projek untuk membantu ahli-ahli perniagaan melibatkan diri dalam perniagaan elektronik (E-commerce) dengan menubuhkan laman web mereka sendiri.

"Melalui cara ini ia akan membantu ahli-ahli perniagaan berkembang dan memasuki pasaran antarabangsa," katanya.

Beliau juga berkata inisiatif MCA untuk membantu memulihkan ekonomi negara melalui kempen Cintai Malaysia dan Belilah Barangan Malaysia di seluruh negara mendapat sambutan menggalakkan.

Mengenai pendidikan, beliau berkata usaha MCA memperbesar Kolej Tunku Abdul Rahman melalui pembukaan cawangan di Pulau Pinang, Johor, Perak dan Pahang akan memberi lebih banyak peluang kepada rakyat melanjutkan pelajaran di dalam negara serta menjimatkan pengaliran keluar wang.

Dalam ucapan lebih setengah jam itu, Presiden MCA itu turut mengingatkan anggota-anggota parti bahawa pencapaian MCA pada hari ini adalah hasil perjuangan dan pengorbanan bekas pemimpin yang telah menunjukkan dedikasi serta komitmen berterusan kepada parti.

-- BERNAMA

RV RON